

2TH - Tolysh Bible

2014

2 SALONIKIJON

Pauli bə Salonikijon Diminə Nomə

2 Salonikijon

PAULİ

BƏ SALONIKIJON DIMİNƏ NOMƏ

VƏSƏ

De İsa Məsihi zuhuri əloğədor Salonikijon imoniyə icmoədə təloş dəvuneydəbin. Salonikijon jıqo fikir kardeydəbin ki, həni Rəbbi zuhuri ruj omə.

Paul bə ın fikri rostə istiğomət doydə iyən nıvışteydə ki, Məsihi zuhuriku bənav şər iyən bevəci lap vey bəbe. Im, ğanun nızınə, məhv kardənin bıə şəxsi rəhbərəti jiyədə bəbe. Im şəxs Məsihi əleyhdore.

Paul voteydə ki, imoniyon bə əzob-əzyəti iyən bə çətinəti diyənı kardə, imonədə ğoym mandənin, deştə dasti zəhməti quzoron dəvuniyəninin.

Nomə məzmun:

1:1-12 Səlonon iyən dıvon

2:1-17 Bə Məsihi zuhuri aid təlim

3:1-15 Bə imoniyon jimoni aid nəsyəton

3:16-18 Səlonon vığandey

1

¹ *Paul, Sila iyən Timoteyku səlonon bıbu bəçəmə Pıə Xıdo iyən Rəbb İsa Məsihi məxsus Salonikədə bıə imoniyon icmo! ² Çəmə Pıə Xıdo iyən Rəbb İsa Məsihiku bəşmə lutf iyən sulh bıbu!

Xıdo Hıkmı Ruj

³ İmoniyə boon, əmə boşməno hejo bə Xıdo şukur kardəninimon, çəmə ımı karde roste, de jıqoy şımə imon şe-şe behəd beydə, şımə bə iyəndı mehıbbətən ziyod beydə.

⁴ Bı səbəb əmə, şımə kəşə həmə təğıbon iyən əzyətonədə nişo kardə durum iyən imoni qorə çe Xıdo imoniyə icmonədə deşmə fəxr kardeydəmon.

⁵ Xıdo de ın əzobon vositə İştə ədoləti nişo kardeydə, səkıştədə şımə esə çəy roədə əzob kəşə bə Xıdo Podşoəti loyiğ zınə bəbeşon. ⁶ Xıdo həğıgətən ədolətine. Əv bəşmə əzyət doəkəson əzyət bədo. ⁷ Əzyət kəşə bəşmə isə çımı əvəzi deyəmə ivırədə rohatəti bədo. Im çe Rəbb İsa deştə ğudrətine mələkon osmono zuhur kardə vaxtı bəbe. ⁸ Rəbb

*1:1 Həv.17:1

İsa de yəlovinə otəşi bə xıdonıznəkəson iyən İştə barədə bıə bə Şoyə Xəbə itoət nıkardəkəson cəzo bədo. ⁹ Bəvon Rəbbi huzuro iyən ğudrətine izzətiku məhrum kardə bıə zolə marde cəzo doə bəbe. ¹⁰ İmon Rəbbi İştə mıġəddəsə xəlği arədə izzət sə iyən həmə imoniyon bə heyret vardeyro omə ruji bəben. Şımənən çə imon vardəkəsonədon, çumçiko bəçəmə kardə şəhodəti bovə kardıyone. ¹¹ Bı səbəb boşməno hejo dıvo kardeydəmon ki, çəmə Xıdo şıməni bəştə dəvəti loyiğ bıvındı, şımə har çokə niyəti iyən bə imoni aid bıə har əməli Deştə ğudrəti bə vıre bırosnı. ¹² Əmə dıvo kardeydəmon ki, deşmə vositə bəçəmə Rəbb İsa Məsihi nomi izzət doə bıbu. Çəmə Xıdo iyən Rəbb İsa Məsihi lutfi hımhımbədə şımənən Deəy ivıredə izzətin bıbən.

2

İsa zuhuri bənav bə ğanuni əməl nıkardə odəmi ome

¹ *Çəmə imoniyə boon Rəbb İsa Məsihi zuhuri iyən əmə çoknə Çəy qırdo qırdə bey həxədə dıġġətin bıbən: ² bıdə «Rəbbi zuhuri ruj rəsə» votə, iddo kardə konqıləsə ruf, qıləy sıxan, yaan qıləy rostnıbə nomə şıməni ağılıku nıkə bə çəkəm-çəkəm enıġandı.

³ Hiçki hiç curə şıməni də dast dənınə. Çumçiko sıftə bə Xıdo vəynə usyon kardə, bə ğanuni əməl nıkardə, məhv bıənınə odəm bə arə benışə həmonə ruj nıbome. ⁴ Bə Xıdo İştəni, yaan Bəy səcdə kardə bə har çiy vəynə beşə ə odəm, ıştəni həmməysə bəpe bəqəte. De jıqoy əv Xıdo məbədədə bənışte, elon bəkarde ki, az Xıdom.

⁵ Şımə yodədə ni ki, az hələ şımə tonə beədə bəşmə imoni voteydəbim? ⁶ Şımə zıneydəşon ki, çəy vaxt rəsəədə bə məydon beşənınə bə həmonə odəmi esət çiç mane beydə. ⁷ Oxo beğanunəti sırınə zu ıştəni həni nişo doydə. Əmma sıftə bə həmonə zuy mane bıə ğıvvə arəo peqətə bıənıne. ⁸ Çəyo bə ğanuni əməl nıkardə həmonə odəm bə məydon bebəşe iyən Rəbb İsa Deştə qəvo beşə nəfəsi əy bəkişte, Deştə zuhuri əzəməti məhv bəkarde. ⁹ Bə ğanuni əməl nıkardə im odəm de Şəytoni dasti har curə pesoxtə mecuza, əlomət iyən xaruqon bəkarde ¹⁰ iyən həmçinin de har curə nohəxəti hilə bome ki, həğiğəti nıpiyeyro xılosiku bə kəno mandə, həlok bıənınə odəmon bə dast dənə.

¹¹ Əvə Xıdo imkon doydə çəvon səpe hiləqorə ğıvvə bo, əvon bə duy bovə bıkən.

¹² De jıqoy bə həğiğəti bovə nıkardə, nohəxəti kardeyku məmnun bıəkəson həmməy məhkum kardə bıbun.

Ğoym bımandən

¹³ Əmə isə, ha Rəbbi piyə boon, bəpe hejo boşməno bə Xıdo şukur bıkəmon. Oxo Xıdo sıftəku şıməni bo Rufi təğdisi iyən de həğiğiyə imoni bo xılos beyro səçın kardışe. ¹⁴ Əy deçəmə bəyon kardə Şoyə Xəbə bəçəmə Rəbb İsa Məsihi izzəti noil beyro şıməni sədo kardışe. ¹⁵ De jıqoy çımı imoniyə boon, deçəmə votə sıxani iyən nıviştə nomon vositə bəştə umutə təlimon anqıl bıbən ğoym bımandən.

¹⁶ Çəmə Rəbb İsa Məsihi İştən iyən əməni piyə Deştə lutfi zolə ciqə iyən xəymandə umu doə çəmə Pıə Xıdo ¹⁷ bəşmə dılvandı bıdə, har xəymandə koədə iyən sıxanədə

şıməni ğoym bıka.

3

Bo iyəndı dıvo bıka mon

¹ Mılxəs, çımı imoniyə boon, boəmə dıvo bıka ki, Rəbbi kəlom şımə arədə bey ğəzinə rəyrə pevilo bıbu de izzəti ğəbul bıbu, ² çə bevəcə iyən şərə odəmonku əməni nığo bıka. Oxo har kəsi imoniş niy. ³ Əmma Rəbb etiboyne. Əv şıməni ruhən ğoym bəka iyən şər bıyku nığo bəka. ⁴ Əmə bə Rəbbi peştıpurimon ki, şımə bəçəmə doə əmron əməl kardeydəşon iyən bəkaşon. ⁵ Bıdə Rəbb şımə dılon bə Xıdo mehibbəti iyən bə Məsihi durumi səbəro bıka.

Deştə zəhməti quzoron bıka n

⁶ Ha imoniyə boon, deçəmə Rəbb İsa Məsihi nomi bəşmə əmr kardeydəmon ki, avərə jimon kardə, bəçəmə təlimi mıvofiğ niyyə imoniyonku diyəro bıbən. ⁷ Şımə iştənən zıneydəşon çəməku çoknə nımunə peqəte lozime. Çumçiko əmə şımə tonə beədə avərə nınevəymon, ⁸ hiç kəsi nuni mıftə nahardımone. Bərəks, şəv-ruj ko kardımone iyən zəhmət kəşəmon ki, bəşmə hiç kəsi şələ nıbəmon. ⁹ Bə səbəb ne ki, əmə bimi ixtiyor rəseydənibe, bə səbəb kardımone ki, şımə çəməku nımunə peqətən. ¹⁰ Həttə əmə şımə tonə beədə bəşmə in əmri domone: ki ko karde piyeydəşni, bıdə nəhə. ¹¹ Məsəmon ki, şıməhonədə kali kəs avərə jimon dəvoneydə; ko kardeydəni, əmma iştəni bə har vırə dəfirsıneydə. ¹² Bı jıləvonon de Rəbb İsa Məsihi nomi əmr iyən xahiş kardeydəmon ki, aşiş-aşişi ko bıka n deştə zəhməti quzoron dəvunın. ¹³ Şımə esə boy, ha imoniyə boon, çokiyəti kardeyku sıst məbən. ¹⁴ Şayət kiysə bı nomədə nıvıştə bıyən itoət nıko, əy iştə nəzədə oqətən iyən deəy əloğə bıbırnən ki, əv xəcolət bıkaşı. ¹⁵ Əmma əy deşmen məzınən, boə ğəzinə bəy nəsyət bıdən.

Səlom vığandey

¹⁶ Sulhi səvon bıə Rəbbi İştən isə bəşmə har vaxti iyən har vəzyətədə sulh bıdə! Rəbb deşmə həmməy bıbu!

¹⁷ Az Paul deştə iştən dasti bəşmə səlom nıvışteyde. İmi iştə har nomədə qıləy xısusiyə nışonə ğəzinə nıvışteyde. ¹⁸ Çəmə Rəbb İsa Məsihi lutf deşmə həmməy bıbu!